

■ OR DA LA VITA DA LUDMILLA CAHENZLI

Gizzar las ureglias en il tren

I dat glied che ha adina si uregliers en il tren e taidla musica. Quai na faschess jau mai. Pertge ir cun tren è interessant.

Jau, Ludmilla Cahenzli, ses adina en la segunda classa. Là marscha insatge. En l'emprima classa sesan mo ils ritgs – mits, lungurus, mintgin sul sulet mo per sai.

En il tren guard jau en ina gassetta e giz las ureglias. Per fortuna hai jau ina buna udida. Jau aud discurs che han lieu dus u trais compartiments pli lunsch davent, era sch'i ha tranteren anc glied che baterla.

Tschel di per exempel, dus compartiments davant mai:

«Jau hai gia daditg udì nagut pli da mes ami», di ina vusch trumpada.

«El vegn schon a s'annunziar», di ina segunda vusch.

«El n'ha gnanca telefonà, be tramess intgins sms», di l'emprima.

«Lura èsi segir tut en urden», di la segunda.

«Ma jau na ves mai el. Pertge hai jau insumma in ami, sch'jau na ves mai el?»

La segunda vusch na respunda betg. Igl è la finala ina greva dumonda.

«Jau na chapesch betg el», cuntinuescha l'emprima.

«Ma vus avais gea pir dacurt puspè fatg pasch», di la segunda.

«Gea. La dumengia passada avain nus discurrì ensem e sclerì tut noss problems. Ma tge gida quai, sche nus n'ans



ILLUSTRATURA YVONNE GIENAL
WWW.YVONNE-GIENAL.CH

vesain uschè ditg betg? Uschia ans vivain nus total in ord l'auter», di l'emprima cun in tun desperà – in tun che lascha sentir che las larmas èn orasumsum, ma vegnan retegnidas cun tutta forza.

Mias mirveglias creschan ad in crescher. Tgi è questa persuna che sto suffrir a moda uschè crudai vla e n'ha betg pli vesi ses ami dapi la dumengia passada. Igl è dal reminent mesemna.

Cun ir sin tualetta ves jau mo la segunda persuna. Ella ha forse la vegliadetgna da mia figlia gronda, pia circa 14. Sin tualetta fatsch jau spert. Jau hai gea nagut da far. Da turnar guard jau sco in

sper sin l'emprima. Ella porta in sexy top cun da mintga vart almain diesch trägers. Ella para d'avair 17 onns. Ma jau na ma lasch betg cugliunar da sminca. Sia vusch tunava ansant numnadamain exact sco quella da mia figlia pitschna. Lezza ha nov onns.

Jau vom pia plaun e plat tras il corridor. Cura ch'jau sun sper l'emprima vusch, stgarpitsch jau sc'in otgà, uschia ch'jau poss gist vesair da surengiu en il sexy top. Là ves jau exact quai ch'jau hai spetgà. Nagut da num. Il BH sut il top cuntegna sulettamain intgins pli-matschs.

Jau di «sorry» e festin da vegnir en mes plaz. Là fatsch jau il quint. En mia calculaziun integresch jau tuttas cumpontas enconuschentas, las sociologicas e biologicas. Mia conclusiun: ella ha maximal 12 onns.

Jau ma concentresch puspè sin mia gassetta e giz las ureglias.

«Tge duai jau star qua e ma vilentar», di l'emprima vusch. «I dat anc avunda umens sin quest mund.»

«Raschun has!», pens jau. «Ed emprova ora uschè blers umens sco pussaivel, avant che ti 'ta vivas d'apart' cun in sulet um.»

Il cudesch pon ins retrair online tar Lia Rumantscha www.liarumantscha.ch (http://www.liarumantscha.ch/sites/content/online_shop.html?shop:view=details&shop:productid=2830) u tar mintga libreria